

欽定剿平粵匪方略

欽定勦平粵匪方略卷一百六十一 丙辰年

八月二十二日

丙午

湖廣總督官文江甯將軍都

與阿署湖北提督楊載福署湖北巡撫胡林翼  
奏言七月十六日武昌城賊開四門分路以撲  
洪山填濠併進直薄我營李續賓自帥湘右營  
前左四哨截於田隴賊殲於濠中者約二百餘  
名我軍乘勝越濠追之城賊又出大股繞小龜

山以襲我後李續燾從旁橫擊偏斃於沙湖者二百餘名其由中和門出城之賊趙克彰等分繞巴頭山截殺追至城下斃賊四百餘名臣楊載福於是日派都司李濟清由沙口出隊往青山防守因青山港有鳧水偷渡入城之賊李濟清卽率三板十餘隻入港轟斃賊二百餘名生擒長髮十數名十七日僞檢點古澗賚率賊千

餘循城北青山油坊嶺江岸修築土壘臣楊載  
福率遊擊鮑超等自沙口出隊至青山會合李  
濟清入港轟擊鮑超等復登岸奮擊將油坊嶺  
賊巢盡行燒燬十八日魯家巷援賊益多並新  
添三壘臣卽添派訓營李續賓亦抽分營哨前  
往助勦鏖戰三時賊稍卻我軍同時並進立破  
其中右二壘馬隊馳驟衝殺斃賊約三百名乘

勝追至黃家店又破賊後路三壘是日臣楊載  
福亦親率陳金鼇帶三板數隻首先衝入港內  
對賊壘轟擊李濟清派勇由上青山登岸繞出  
賊後焚燒賊巢將賊壘浮橋概行燒燬十九日  
賊又以民划入南湖湯孫湖潛泊岸旁冀於夜  
間放入湖中驚臣後路瞿定國等於夜半突出  
百餘人挾火具登岸焚其划船殆盡二十日東

湖船二十餘號由閔橋直趨魯家巷左壘援賊亦出二萬餘撲魯家巷各營臣卽飭瞿定國先夜以三板挽入東湖繞擊賊船之後陸師則以礮沿湖轟之及賊船將近各勇解衣涉淺爭奪賊舟傷斃水賊百餘燒賊船三隻餘船仍奔入港二十四日瞿定國等又奪獲賊船四隻斃賊三十餘名二十五日副都統銜護軍參領舒保

之馬隊全數至洪山安營二十六日赴魯家巷  
出賊不意踏其一卡生擒僞司馬李洸發斬之  
二十八日援賊城賊四面紛出約二三萬李續  
賓嚴陳以待約一時許號旗一揮各營齊出趙  
克彰奮勇爭先立斬衝鋒悍賊數名蔣益澧等  
率營抄截護軍參領舒保率馬隊四面衝突賊  
遂大敗伏屍滿途李續賓等各率勇分路邀截

姚家嶺窰灣沙子嶺小龜山之賊賊殊死鬪一  
股敗退一股繼進酣戰良久馬隊數十騎復橫  
掠沙子嶺而過槍箭並發余雲龍亦率勇從東  
湖繞姚家嶺而上從旁襲之賊遂大亂紛紛退  
走追至小龜山腳惟鮎魚隄一綫之路敗賊擁  
擠自相踐踏偏斃於沙湖及槍礮轟斃之賊約  
七八百名蔣澤溥朱品隆追過雙鳳山左右斃



賊亦約二三百名統計各營斃賊約一千數百  
名斃黃衣騎馬賊目數十名是日各路之戰如  
魯家巷之援賊則張榮貴率勇迎勦踏破賊壘  
四座斃賊二百餘名其東湖之賊船出護陸賊  
經瞿定國焚燒三十隻其湯孫湖匿港之賊划  
則姚教忠轟燬七十餘隻斃賊三百數十名追  
至舒家橋縱火將賊划燒盡又登岸燒其賊巢

八十餘戶臣楊載福是日亦率李濟清等破賊  
上青山三壘追至油坊嶺渡口毀其浮橋陳金  
鼇率船攻壇角之賊亦破其一壘八月初三日  
李續賓等赴魯家巷助勦三路齊進追逐十餘  
里踏平賊壘六座斃賊六七百名初六日三更  
偵探賊之後路四營已動賊將遁矣壘中賊聲  
甚響更鼓已亂初七日丑刻急飭張榮貴會合

各營分三路進剿舒保率馬隊由洪山馳往接  
應天尙未明我軍連破大壘十三座小卡無數  
斃賊千餘名匪徒漫山遍野紛紛下竄馬隊追  
及於土橋殲其後隊無一脫者賊奔益急七八  
十里之地無一返顧迨追至華容則已百餘里  
矣計斃賊千數名生擒六十餘名僞溺於內湖  
者不可數計此七月十六日至八月初七日水

陸分攻馬步合勦大破城賊援賊之情形也該  
逆石達開初至氣燄頗熾仰仗

大威旬日之內大小二十餘戰大挫逆鋒解散脅從約  
計萬人敗賊尙有萬餘已至大冶興國而臨江  
賊首僞侯黃玉崐復以大眾至興國會合賊情  
詭祕尙宜嚴防所有統帶馬隊之副都統銜護  
軍參領舒保等可否分別獎勵其力戰陣亡黑

龍江六品藍翎甲兵倭索爾札嗎立付善烏勤  
希遜依郎阿巴彥吉爾嘎應請照驍騎校例議  
卹遊擊劉錫文等並請分別議卹守備李登闢  
戰功素著因傷成廢可否比照實缺守備例在  
籍食俸奏入

論內閣曰此次旬日之內大小二十餘戰水陸皆能  
用命而馬隊之功居多解散脅從約計萬人仍著胡

林翼等督軍悉數殲除趕緊克復城池無再延玩所有在事尤爲出力之參領舒保著賞給倭什洪額巴圖魯名號記名道安慶府知府李續賓著賞加布政使銜都司何紹彩著賞換花翎免補都司以遊擊儘先升用其餘水陸各營出力員弁著准其彙案保奏力戰陣亡之黑龍江甲兵倭索爾札嗎立付善烏勒希遜依郎阿巴彥吉爾嘎均著照驍騎校例議卹遊

擊劉錫文著照參將例議卹把總晏光明顏真彥外  
委李升剛把總艾文軒李啟相黃武泰唐永飛外委  
蘇文炳陳龍開田福勝陳文昌孫連升唐隆保傅正  
榮李德輝丁光彩朱萬勝黃良仕陳紹林均著照例  
從優議卹擬保外委朱朝青黃建四金太和黃吉亨  
羅起富嚴得標周南桂袁正華六品藍翎何連勝已  
革把總楊慶春均著照外委例從優議卹守備李登

關因傷成廢著比照實缺守備例准其在籍食俸

胡林翼又奏言馬隊爲我

朝勁旅

天威所臨羣兇震懾茲以四百渡江旬日之內擊走悍  
賊厥功甚偉所有馬隊員弁兵丁理合先行繕  
單保獎可否仰邀

俞允以示鼓勵奏入



上諭內閣曰馬隊官兵渡江勦賊最爲得力黑龍江佐  
領西林佈著賞加阿木爾罕巴圖魯名號委參領儘  
先升用驍騎校花凌阿著賞加圖蘇普特依巴圖魯  
名號吉林委參領雙福委驍騎校雅隆河驍騎校色  
克精額額外驍騎校貴廉黑龍江驍騎校德平委驍  
騎校烏普芮塔青阿甲兵農依佈岳隆阿均著賞戴  
花翎吉林驍騎校慶安黑龍江驍騎校巴彥杜勒均

著以佐領儘先補用並賞戴花翎黑龍江委防禦溫  
德勒克喜著以驍騎校儘先補用吉林甲兵三慶托  
克托佈黑龍江領催額爾登額巴彥佈德隆阿喜明  
均著以驍騎校補用吉林領催委防禦來福委驍騎  
校德海榮大奎英明升額外驍騎校和順軍功春瑣  
德隆阿奎春全盛斌誠達豐阿全安英山連成富奎  
興春甲兵穆吉楞額關德富春福英祿常在雙有拉

杜舒成富羣富亮巴彥太德興阿永和貴有薩音布  
雅黑龍江委驍騎校愛林保領催巴凌薩穆齊穆慶  
阿庫墨善軍功巴克唐阿壽昌札勒芬佈德凌尼壽  
巴爾沁綽力善愛新伊爾吞富慶阿成福庫蒙額尙  
裕德綳阿德明阿甲兵巴立善博新哲西祿善立興  
額雙全郭爾敏依勒興阿隆太阿克棟保依慶額明  
成均著賞戴藍翎吉林甲兵德慶倭克精額德慶常

明勝貴富勒琿八十九春德達凌阿全有增祥富順  
莫爾青阿安崇阿黑龍江甲兵壽亭烏爾西佈台平  
阿倭興阿雙西保色克精額巴圖力托普興阿恩特  
和善巴揚阿悅地善圖敏哲忠保郭興阿巴凌阿依  
力佈巴圖爾札巴倭倪郭對依成額富平阿米方多  
勒吉鐵保均著賞給六品翎頂吉林佐領富新著以  
參領儘先補用委防禦承惠著賞換花翎黑龍江委

防禦圖尙阿著以驍騎校升用廣音佈委驍騎校烏  
豐阿均著賞戴花翎吉林甲兵德貴楊玉雙永凌陞  
德慶委官圖善黑龍江甲兵喜蘭保富隆阿富勒春  
庫克精額前鋒博清阿甲兵富慶全保蒙果勒佈郭  
爾炳阿保住穆棟阿富勒佈慶壽額勒和布拜奴善  
均著賞戴藍翎吉林甲兵雙林黑龍江甲兵雙喜努  
胡德依巴奇那慶福常雲保均著賞給六品翎頂護

軍校貴成著免補本班以空花翎補用

同日德興阿翁同書奏言前因揚營失利郡城  
再陷奉

旨將雷以誠革職查辦 臣等遵查本年二月二十八日

金陵下竄之賊與瓜鎮逆匪合夥攻撲土橋迨

至日暮官兵傷亡益衆 臣等均追至三汊河暫

駐次日 臣德興阿帶隊由西岸進勦東岸官兵

隔河開礮助戰俄報賊由樸樹灣過河托明阿  
派臣德興阿赴蔣王廟迎勦另股由凍青鋪渡  
河焚掠托明阿遂由三汊河帶馬隊截勦詎意  
賊匪分股攻撲愈來愈衆三汊河旋即失守雷  
以誠退至沙頭嗣由沙頭登舟復至艇船據稱  
意在聯絡江南援師至初七日雷以誠自焦山  
回至萬福橋時因賊踞揚城道路梗塞以致東

西兩岸信息不通此揚營失利前後數日實在情形也至收復揚城奏報不符最爲緊要關鍵臣等公同訊問據雷以誠供稱是日原未親身帶隊入城至勇目臯廣德帶勇爬城則實有其事雲梯四架現尙存黃泥溝可以查驗又有陣亡壯勇二名受傷一名可據惟鄧紹良所報砍獲首級耳記及奪獲器械旗幟等件並未繳驗



革員係查照報單摘敘入摺等語查此次揚營  
失利實因變起倉猝力不能支並非不戰而潰  
雷以誠矜才恃氣言動輕躁馴至兵勇不睦怨  
謗交加雖失事由於西岸而東路亦不能守厥  
咎惟均責無可貸洎退守沙頭後不卽督勇進  
攻遷延累日尤爲失計於收復揚城一事雖非  
有心捏飾但不應憑勇目稟報之詞輒稱與鄧

紹良會兵進勦以致彼此爭執前後兩歧縱無  
冒功之心殊非覈實之道

德興阿翁同書又奏言前以雷以誠軍營委員  
雷鳳翥等勸捐發餉種種營私疊奉

諭旨交臣等查訊遵查縣丞黃鍾係雷以誠女婿與伊  
胞兄知縣黃斌同在雷以誠軍營當差據黃鍾  
供稱上年十月間到霍家橋勸捐有典商董事

常振雲願捐錢四百二十千文外加點夫馬轎費二百千文本年二月間在楊獸壩勸捐有民人吳順祥卽吳順發願捐錢四百千文折銀二百兩俱已繳歸總局均未給收條並無鎖禁吳順祥責打常振雲之事又據吳順祥卽吳順發供稱今年二月間委員黃鍾到楊獸壩寫捐因伊不在家將伊子吳永貴帶到廟裏管押並未

鎖禁又訊出黃鍾在楊獸壩勸捐曾將地保殷  
標李全等掌責至方家巷置買田產一節據黃  
鍾供稱因家鄉被擾商議置買田畝上年八月  
間奉委辦理礮艇捐務不能分身託胞兄黃斌  
經手承辦方家巷田畝一處是實等語正擬嚴  
切根究黃鍾旋患痧氣身死又查候選直隸州  
知州雷鳳翥係雷以誠之胞姪從前雷以誠在

萬福橋駐營之時委管支發局事務迨移營桂  
花莊後派令帶勇並收發練勇口糧原叅內所  
稱發餉每名日給錢三四百文不等外示優厚  
而內則每百必扣三十文一節據雷鳳翥供稱  
所有勇糧均係原領原放並無絲毫剋扣惟因  
各勇隊內有百總五十總十總教習總旗等名  
目管束訓練差使既有勞逸口糧向有區別而

供稱徐震甲本係文藩司委管白塔河釐捐委員嗣經托明阿等札委兼辦江甘畝捐委無令徐震甲謀利之事亦未在蘇開設布莊惟徐震甲籍隸揚州不合將吳雲告示列銜鈔貼又查出徐震甲於五年正月閒隨同張廷瑞勸辦米捐因丁溝畝捐米捐均不應手有杜成祿出言頂撞徐震甲性急氣忿舉手自批其頰實屬舉

動輕躁不知大體又查原參委員內有翁壽慶  
虞泳齡二人翁壽慶係捐納布政司理問據供  
隨同雷鳳翥管理支發局惟因雷鳳翥係奏派  
人員且久經在局經理是以局中公事均未經  
手於公牘亦多未會行等語虞泳齡係專辦甯  
幫米捐委員經文煜將該員差使撤銷業已回  
浙尙未解到應卽將全案訊結查黃鍾業經病

故應毋庸議雷鳳翥擬先行請

旨革職交刑部擬罪石光達等擬請

飭部一併分別定擬奏入

上諭內閣曰前因揚州軍營失利雷以誠接應遲延並捏稱助剿收復揚城當經降旨革職拏問交德興阿等嚴訊請旨又因御史方濬頤何桂芬奏雷以誠軍營委員雷鳳翥等勸捐發餉種種營私復諭令德興



阿等一併提訊茲據奏稱本年二月間三汊河失陷雷以誠退至沙頭後不卽督勇進攻遷延累日實爲失計其收復揚城但憑勇目稟報之詞輒稱會兵追剿亦屬奏報失實又於伊姪雷鳳翥伊壻黃鍾在營舞弊毫無覺察實屬辜恩雷以誠著發往新疆效力贖罪委員黃鍾業經病故著毋庸議雷鳳翥挪湊支發局銀兩交監生石光達管運濫給家人張安功牌

發放勇糧變通支給並未申報又在揚城置買房產  
實屬牟利營私著卽革職交刑部定擬罪名具奏石  
光達爲雷鳳翥營運圖利徐震甲因勸捐責打杜成  
祿騷擾地方吳雲總辦畝捐於徐震甲辦理不善未  
能察出黃斌於伊弟黃鍾置買田產並不阻止翁壽  
慶襄辦支發局務並不經手會行均有不合該員等  
應得罪名著該部一併分別定擬

德興阿翁同書又奏言據觀音門水師總兵陳世忠呈報七月二十八日瞭見賊船四五十號由燕子磯而來勢甚洶湧我師起碇迎擊用大礮疊轟中其巨艇篷桅登時沈沒延燒賊船無數逆衆紛紛投江經外委李贊彪等奪獲礮船二隻訊據賊供楊逆定計分起先破浦口觀音門水師卽順流偏擾六合儀徵以通北岸瓜州

往來之路旋據署江浦縣知縣袁瑞麟稟稱八月初六日檢獲賊首僞旅帥譚盛條一名供出僞北王韋姓於本月初三日自上江敗回帶有逆船二百餘隻下駛已由金陵登岸稍歇數日卽分路攻撲浦六營盤等語臣等現飭各路帶官兵豫爲戒備遇有賊警彼此聯絡應敵呼吸相通以資捍禦至瓜州之賊欲糾南岸大股逆

匪從儀徵西竄六合積謀已非一日擬飭鞠殿  
華西昌阿等帶領新挑兵勇會合陳國泰舟師  
及儀徵水勇直搗瓜巢奏入報

二十三日

丁未

福濟奏言已革山東巡撫張亮基

前在楚省堵剿粵匪屢著戰功深悉賊情現在  
皖省軍務喫緊萬分正資臂助仰懇

天恩飭令張亮基馳赴廬州幫辦防勦實於皖營大有裨益奏入

上諭內閣曰已革山東巡撫張亮基著發往安徽隨同福濟辦理軍務

二十四日 戊申 和春福濟奏言查三河距廬城僅

九十里係南北往來通衢實郡城第一門戶該逆死力拒守於四面堆砌石壘高至數丈進攻

非易因先後募勇二千餘名在西南一帶逼近賊壘扼要紮營晝夜攻擊斬擒多名八月十一日該逆大股來撲經參將程智泉等帶領兵勇奮力擊殺殲斃六七百名生擒十五名餘賊敗退十二日又來賊千餘名在金牛一帶窺營麟瑞等馳往攻勦殲斃三四百名立將賊壘平毀十七日臣和春督同麟瑞等於初更後偃旗息

鼓攜帶雲梯攻具潛伏而進乘夜暗襲一面飭  
令熊天喜等攻打南路賊壘越過內外濠齊抵  
街口賊營及石壘牆下開放槍礮頃刻營內火  
起賊衆驚亂越牆逃出均被兵勇砍殺乘勝擁  
進卽將賊營奪獲街內之賊自相踐踏我軍已  
四面豎立雲梯翻牆而入登時街內火發賊衆  
紛竄官軍迎頭截擊死者無數卽於十八日子



刻將三河克復餘賊竄至白石山同該處賊匪  
均向焦湖而逃隨一齊追擊見湖邊泊有多槳  
等船百餘隻逆匪正在上船我軍趕至連開槍  
礮燒燬多隻該逆落水死者不計其數先後擒  
斬賊匪八千餘名現趕緊乘勝攻取廬江巢縣  
以期次第肅清再岳州城守營參將程智泉殺  
賊勇敢勳績卓著因追賊搶至內濠中礮陣亡

都司吳濟美於七月十六日猛攻賊營被賊礮  
傷身故千總伍坤萱把總黎連貴外委盧鵬超  
均隨程智泉搶至街口中礮陣亡合無仰懇

天恩俯准飭部一併從優議卹奏入

上諭內閣曰安徽逆匪自廬州克復後竄踞三河經和  
春節次攻勦屢有斬獲當將三河克復勦辦甚屬奮  
勇著福濟會同鄭魁士趕緊乘勝進取以期次第肅

清所有在事出力文武員弁兵勇准其擇尤保奏追  
賊陣亡及因傷身故之副將銜參將程智泉著交部  
照副將例從優議卹都司吳濟美千總伍坤萱把總  
黎連貴外委盧鵬超著一併從優議卹

又諭內閣曰逆匪竄踞三河已逾半載此次和春督  
兵深入連克賊巢埽平堅壘殲斃逆匪至八千餘名  
之多實屬奮勇可嘉著發去綠玉翎管一枝白玉搬

指一箇小刀一把大荷包一對小荷包四箇交該大臣祇領以示獎勵

同日邵燦庚長奏言前因金陵大營失利上游匪勢鷗張瓜逆又時思分竄揚州迤北以邵伯爲衝衢奈防勇無多難資抵禦臣邵燦前派赴平橋防堵兵勇六百名續令進駐寶應縣之汜水鎮爲邵伯後路聲援旋因瓜逆窺伺裏下河

一帶而江浦逆黨又有從六合天長直竄蔣壩  
之謠查蔣壩附近清淮情形喫緊當將汜水兵  
勇移緩就近急調回清江堵禦淮安以下仍須  
擇要設防以杜內竄臣等審度形勢山陽縣所  
轄之戴家灣地方有險可守當經臣邵燦飭委  
淮安府知府恆廉督同山陽縣知縣王慶瑞將  
應辦事宜次第經理現據稟該處陸路則修築

職位釘立竹籤水路則分撥漕船嚴查奸宄臣  
邵燦一面檄飭淮安城守營參將伊米揚阿督  
帶防勇前往駐紮並嚴諭在事各員約束練勇  
認真巡防不准稍有鬆勁奏入

上命軍機大臣傳諭邵燦庚長曰前據瑞麟慶祺奏盱  
眙縣之蔣壩濱臨洪湖與水路之邵伯鎮同爲清江  
門戶必須嚴密設防本日據邵燦庚長奏已將汜水

鎮兵勇調回清江以防蔣壩並於戴家灣水陸各路  
安礮釘籤分撥漕船巡查布置尙爲周妥著卽照所  
議辦理仍著嚴飭派往之參將伊米揚阿會同該府  
縣督帶兵勇勤加操練一面激勵民團互相聯絡不  
得始勤終怠虛應故事

二十七日

辛亥

和春福濟奏言查廬江距三河僅

七十里逆匪踞守時逾三載八月十九日臣和

春率同副都統麟瑞等帶領馬步兵勇於二更  
後銜枚前進二十日天色微曙齊抵廬江城外  
該逆四五千人前來迎拒官軍兩面夾擊馬隊  
左右圍抄鏖戰甚久逆匪紛紛倒地盡力斬殺  
屍徧郊野餘賊敗入城中我軍槍至濠邊將賊  
壘五座先後奪獲一面進逼城根設法進攻探  
得該逆被勦緊急意欲夤夜潛遁當令嵩瑞等





僞將軍高長有等二十餘名分別正法凌遲處  
死千總劉富元首先搶進賊壘額被槍傷陣亡  
仰懇

天恩飭部從優議卹奏入

上諭內閣曰官軍自八月十八日攻克三河石壘後卽  
於十九日夜間乘雨進兵馳攻蘆江二十日黎明齊  
抵城外殲斃無算立將縣城克復此次官軍於三日

內連將三河盧江攻克實屬奮勇所有在事出力員  
弁兵勇准其彙案保奏陣亡千總劉富元著交部從  
優議卹

同日何桂清奏言據總兵饒廷選咨稱江西甯  
都一帶忽起會匪勾結粵逆竄陷廣昌新城南  
豐瀘溪等縣貴溪本駐有廣信勇二千名已革  
皖南道石景芬帶勇於八月初二三等日陸續

前進訓導郭守謙於初三日正欲拔營繼發聞賊已由小路來撲貴溪郭守謙出隊遇賊先已獲勝嗣因該逆四面兜裏寡不敵衆力竭陣亡餘勇潰散賊卽竄入貴溪並聞石景芬之勇亦已潰散江西學政廉兆綸現駐河口因兵力愈單咨請速調常玉防兵赴廣應援該鎮卽在玉山防兵內挑選閩浙兵勇二千一百二十八名

於八月初九日統帶起程赴廣援勦仍留兵勇  
一千一百名交遊擊高士濬管帶駐紮玉山以  
爲後路策應等語臣思賊蹤飄忽靡常該逆一  
聞廣信有備設或旁竄德興則常山開化隨在  
可虞該二處原防兵勇無多必須添勇堵禦現  
飭知府王慶勳管帶華勇七百名同知俞斌管  
帶兵勇六百名由省馳赴常山交署金衢嚴道

繆梓會同衢州鎮總兵富勒興阿相機防堵仍  
飭饒廷選確探賊情兼顧常開後路以杜竄越  
何桂清又奏言饒廷選於八月初九日帶兵起  
程行抵廣郡察看城廂內外居民鋪戶遷徙一  
空僅存署知府沈葆楨署參將榮壽上饒縣知  
縣楊昇三員相爲守禦當派兵勇嚴密巡防一  
面查探賊蹤相機勦辦初十日探聞賊由興安

河口直趨郡城十一日分三路蠡擁而來約有三四千人該鎮派遊擊江長元等分路出城迎擊轉戰五時之久斃賊二三百名奪獲旗幟器械無算賊衆大敗退走五六里惟逆匪於我軍收隊後仍占踞西北角城外民房未退該郡初無準備亦無江省兵勇會勦諸事委之客兵辦理實形棘手臣已飛咨饒廷選激勵將士力扼

要衝嚴密防勦廣信能保無虞卽衝屬民心亦  
藉以鎮定其陣亡之漳州城守外委陳飛鳳應  
請先行

飭部從優議卹奏入

上命軍機大臣傳諭曾國藩文俊何桂清曰饒廷選到  
郡後與署知府沈葆楨合籌防勦殺賊多名尙爲得  
力而江西並無兵勇會勦專恃客兵恐難應手饒廷



選一軍既抵廣信俟賊匪擊退自應設法將失陷各縣次第收復而兵力尙單著曾國藩文俊酌派大員帶兵前往會同饒廷選克復被陷各縣並著何桂清飭知饒廷選如廣信賊蹤敗退卽帶兵前進會合江西派出之軍將被陷各城收復再行回駐玉山所有廣信勦匪陣亡之外委陳飛鳳著交部從優議卹

同日曾國藩文俊奏言逆匪自去冬今春攻陷

吉袁瑞臨等府因水路不得逞志於我遂於吉安臨江瑞州三府造船鑄礮並於生米司瑞河口臨江河口深溝高壘密排礮位專擊官軍船隻而護瑞臨賊舟爲衝出省河之計七月初一日賊由松湖帶戰船三十餘號陸賊千餘將抵瑞河口江軍水師候補道劉于瀆派李鴻泰等傍山迎敵百礮轟發擊斃溺斃之賊各數十名

熊吉華管帶小划督勇登岸殺斃陸賊多名餘  
賊逃避山中燒燬賊匪大快蟹船二號奪獲大  
戰船二號三板小划三號大礮十二尊其生米  
河沿之賊被楚軍遊擊劉國斌礮船日夜轟擊  
賊衆膽寒遂於初五夜棄營而遁我軍追獲大  
礮四尊火藥五十九桶大小子彈槍械旗幟尤  
多七月二十七日劉于瀆親督守備李鴻泰等

營戰舟小划前往臨江河口巡哨該逆於南北  
兩岸堅築礮臺二座外設浮橋內牖木板又於  
裏河爲連珠小礮臺五座劉于瀆傳令往樟樹  
鎮會齊派曹篤清等船上前引賊至浮橋口門  
佯爲膠淺回船退走賊果擁出追趕我軍小划  
隨卽進口斬斷浮橋水船銜尾進剿陸勇分投  
登岸夾擊賊船進退無路殺斃擊斃溺斃之賊

約四百名奪得大小戰船九號大小礮位四十  
七尊米煤等船十三號燒燬數十號二十八日  
賊匪退守臨江城下劉于瀆派王炳等以三板  
徑入內河陸勇伏於南岸隄下賊果水陸來追  
我軍回棹返擊縱火焚賊划二十餘號奪獲大  
礮六尊米煤船十餘號子藥十餘石下游水師  
之駐紮吳城者七月二十七日惠潮嘉道彭玉

麟帶後營導營赴下游巡哨行至南康循東岸而下遙見謝師塘陸賊土犯賊舟亦自西岸神林湖列陣而出彭玉麟率各營哨對敵逾時賊舟敗北我師乘勝窮追去吳城老營已隔一百三十里捩柁收隊行不數里南風忽起該逆見南風之不利於退師也遂回棹返攻極力猛撲礮如驟雨我軍亦停棹對擊煙燄蔽空湖波

大作軍心搖惑幾至不支彭玉麟傳令大舟下  
碇與之坐戰陣腳稍定各三板亦回頭奮擊衝  
枚無譁千礮雷震賊勢蹙復敗我軍揚帆佯作  
欲追之勢待賊舟奔北已逾二十里始行收隊  
五更乃抵老營查江西水賊以湖口逆舟最爲  
兇悍而吉安臨江瑞州三處修造船礮各治水  
軍以圖上下夾擊困我省垣臣等派彭玉麟駐

吳城以防湖口劉于瀉駐豐城以防贛河臨江  
河劉國斌駐市汊以防瑞河數戰俱勝從此瑞  
臨兩河賊舟不足爲害上游漸易肅清侯補道  
劉于瀉自督帶水師以來無戰不勝以寡禦衆  
士卒樂爲效命顛懇

天恩賞戴花翎以示鼓勵其所部出力員弁及彭玉麟  
所部出力之員可否容臣等覈保數人出自



天恩奏入

上諭內閣曰江西逆匪修造船礮於生米司瑞河口臨江口等處築壘經候補道劉于瀆等督派水軍進剿將賊壘盡行掃除其謝師塘之賊亦經彭玉麟奮擊敗竄此股逆匪膽敢於省城附近地方築壘候補道劉于瀆水陸夾攻以次掃蕩勦辦甚爲得力著賞戴花翎出力員弁著曾國藩擇尤保奏

曾國藩文俊又奏言楚軍初至瑞州時該逆方大舉撲犯省城於省河之對岸數十里內築立賊壘五六處其塘頭凌一壘去省垣十里日來沙井搦戰僅隔一河臣等欲派兵勇迎接瑞州之援師必先攻破沙井之賊壘七月初四日渡兵二千餘人進勦直抵塘頭凌踏破逆壘二座初九日添派新字營虎字營合四千人前赴瑞

州十五日到郡與鄂省援師會合十七日該逆以江軍新到營壘未堅遂出大隊六千人猛撲新到江軍之營各營分路抵禦守備李大雄力衝中堅賊卽潰散殺賊五百餘人二十七日楚軍派三成隊出迎餉項賊又分股來犯湘勇寶勇鏖戰多時都司李新華等從東北抄出槍礮兼施賊衆大敗江軍由北門追至西門與湘寶

各營會合殺賊共五百餘人餘衆狂奔入城查  
湖北援師四月初間自鄂省起行追賊繞至長  
沙旋復馳至江西酷暑行軍轉戰千有餘里克  
復咸甯蒲圻崇陽通城新昌上高六縣扼駐瑞  
州以通兩湖之路江西全局之轉機胥繫乎此  
所有帶兵得力之員應卽籲懇

恩施以示鼓勵奏入

上諭內閣曰湖北援師攻剿瑞州疊次獲勝楚軍現駐  
瑞州以通兩湖之路所有帶兵文武各員均能奮不  
顧身冒險攻擊自應量予恩施湖北補用參將普承  
堯著以副將遇缺卽選湖南候補同知吳坤修著以  
知府歸湖南補用同知銜曾國華著以同知儘先選  
用候選知縣劉騰鴻著以直隸州知州歸江西補用  
並賞給衝勇巴圖魯名號其餘出力員弁著准其擇

尤保奏

會國藩文俊又奏言查吉安被圍兩月有餘逆  
衆數萬百計攻撲經在城文武悉力守禦殲擒  
多賊乃因城牆兩次轟塌失陷該員弁或臨陣  
捐軀或從容殉節大義凜然前次該員弁等槍  
護缺口出力經臣文俊奏奉

諭旨查明彙保當卽逐加酌覈旋聞該郡失陷是以未

經出奏合無仰懇

天恩將臬司周玉衡等均照擬保官銜

飭部分別議卹周玉衡久任贛南堵勦粵匪力衛邊疆  
素著聲威士民感戴並請於吉南贛三府各建  
專祠陳宗元等均於吉安祠內附祀以慰忠魂  
奏八

上諭內閣曰上年江西吉安府被匪圍攻按察使周玉

衡知府陳宗元等督同在城文武登陴固守兩月之  
久斃賊多名經文俊以搶護城垣出力擬保升階尙  
未奏到旋因兵單食竭府城失守該員等捐軀殉節  
大義凜然著各照升階賜卹以示優異江西按察使  
周玉衡著照布政使例吉安府知府陳宗元著照道  
員例參將柏英著照副將例吉安府通判王保庸著  
照同知例廬陵縣知縣楊曉昫著照知府例都司馬



福壽著照參將例周玉衡之子江甯布政司理問周  
恩慶著照知州例縣丞周自新訓導張滋均著照知  
縣例生員范雲程著照從九品例縣丞秦振元著照  
知縣例知縣王見周著照同知例陳宗元之子監生  
陳世濟著照千總例軍功王虎臣著照府經歷例俊  
秀程虎炳軍功秦登元均著照從九品例府經歷林  
蔚著照知縣例外委韓衍彬著照外委例各議給應

得卹典署吉安府經歷余焯府照磨胡瀚吉安府教  
授余步蟾廬陵縣縣丞呂承恩典史章德懋教諭李  
傳心訓導吳襟浩舉人李鴻鈞未入流孟國觀都司  
克什布署守備蔡元陞署把總李德魁把總吳廷瑞  
藍珩千總鄺昌貴把總戴文斌千總謝明亮額外劉  
起元劉效熊外委鄧家璧知縣萬慶章均著交部從  
優議卹周玉衡著於吉南贛三府各建專祠陳宗元

等均著於吉安府祠內附祀以慰忠魂

曾國藩文俊又奏言六月十四日楚軍擬於撫  
州西南城根隄下築一新壘以截賊蹤而空隧  
道以爲轟城之計賊卽併力來爭我軍抵陣衝  
鋒殺賊四十餘名隄上之賊復經江軍轟斃數  
十名二十日楚軍仍於西南城隄上潛築新營  
再掘隧道賊疊次來撲我軍攻勦屢勝七月初

一日探報逆目黃玉崐黃士幅等由臨江崇仁  
統賊七千餘人冀圖與郡城悍賊內外夾攻猛  
撲我軍老營然後併力以西禦兩湖來援之師  
是夕至上頓渡民房占踞我軍於初二日五鼓  
派隊馳勦逆黨四千餘人已於四更時潛伏卡  
外我軍行抵該處賊分三路包來周岐山等分  
抄夾攻殲賊二百餘人追殺二百餘名黃玉崐

僅以身免當各軍乘勝追捕之時城內突出二千餘賊以數百人犯江軍以數百人犯掘隧之新壘以千人犯楚軍之中營均被我軍擊退是日自卯至午鏖戰四時共殺賊五百名積屍十餘里初十日黎明賊黨三四千人出犯中營我軍併力衝突賊始退至隄邊旋猛撲新壘緣新壘之中開掘兩隧賊黨偵知特用全力圍逼忽

值大雨如注我軍槍礮皆不能然賊遂撲入力戰一時之久不能奪回次早賊復大至各營堅壁不動待其疲乏一擁而前賊出不意潰至隄根我軍用排礮併擊血戰半日殲賊四百餘名十三日寅刻賊卽吹角出城火光徧野黎明分三路來犯中左右三營我軍先用大礮轟倒八九名賊仍不退時督隊之賊左突右衝大隊皆

受其指揮突被礮轟落馬遂狂奔入城是日賊  
黨數千人出北門過西津渡竄去人數約六千  
餘悉赴瑞臨以禦兩湖之援師由是撫州之賊  
數稍減我軍久戰力疲亦少資休息目下兩湖  
援師已至瑞州賊勢全注西路臣等仍飭李元  
度圍偃撫城力圖克復以期肅清東路

曾國藩文俊又奏言三月初開逆首石達開竄

擾皖南帶去男婦一萬餘人然所帶者多係江西新擄之民非盡兩廣久從之賊江西賊勢仍未稍衰八郡名城久被淪陷南康雖經收復尙無陸兵駐守刻下贛州建昌饒州三府各有兵勇數千撫州瑞州袁州三府各宿重兵將近萬人查閱僞文參覈各處探報賊首之在江西主持軍務者自去年十一月至本年二月底以僞



易王石達開爲主三四五月以僞易貴丈黃玉  
崐爲主六七月後以僞北王韋昌輝爲主如九  
江之林啟容瑞州之賴積新湖口之黃汶金皆  
著名劇賊撫州之三檢點建昌之張三和袁州  
之李能通雖不甚著名亦復譎謀百出堅悍異  
常統計江西境內廣西悍賊與廣東湖南新附  
之賊約在四萬以外本省甘心從逆之匪約在

三萬以外而皖鄂兩省上下往來之賊不在此  
數臣等忝列戎行惟當一意鎮靜妥爲布置以  
安軍民之心奏入均報